

■ FRACZIUN PCD

Per la nunvalaivladad da l'iniziativa da la chatscha speziala

(cp) La fracziun da la Partida cristian-democratica (pcd) en il cussegl grond è stada radunada a Tusaun – sut il presidi da deputà Marcus Caduff – per sa preparar per la sessiun da favrer. Ella è per la nunvalaivladad da l'iniziativa da la chatscha speziala e per dapli segirezza. Er è ella per far part dal concordat davart prestaziuns da segirezza privatas e per il concordat midà concernent mesiras cunter la violenza tar occurrenzas da sport.

Extendidamain è la fracziun s'occupada cun l'iniziativa chantunala per abolir la chatscha speziala, vegnida preschenta da dals deputads *Daniel Albertin* ed *Ernst Sax*. La costituziun pretenda dal cussegl grond ch'el examineschia iniziativas chantunalas. «Ina iniziativa è totalmain u parzialmain nunvalaivla sch'ella stat en contradicziun cun dretg surordinà.» La pcd sustegna l'opiniun da la regenza che questa iniziativa cunterfetschia al dretg federal. Vulair metter en vigur l'iniziativa segund dretg federal, uschia ch'ella corrispondess a l'intenziun dals iniziants,

n'è betg pussaivel. Questa iniziativa cunterfetschia numnadamain a la lescha da guaud da la confederaziun, essend che regular l'effectiv dals tschiervs na pudess betg succeder pli.

Ina chatscha tras emploiads, durant la quala collavuratur dal chantun pudesan sajettar giu – enstagl dals chatschadurs – il november e december ca. 600 animals e che duess gulivar il manco da la chatscha auta n'è betg compatibel cun il senn ed intent dals iniziants. Perquai tegna la fracziun l'iniziativa per ina attga fruntala sin la libra chatscha da patenta. Ella sustegna tala e refusa l'iniziativa cunter la chatscha speziala, essend che quella cunterfa al dretg surordinà, quai che vegn era constatà en ina expertisa.

La fracziun renconuscha dentant che l'iniziativa inoltrada cun pli che 10 000 sottascripziuns laschia percorscher in tschert malessar tar la populaziun visavi la chatscha speziala. Perquai è la fracziun per tschertas adattaziuns pertutgant la chatscha auta e speziala en il Grischun. Uschia prenda ella serius l'intenziun dals

iniziants. Quai succeda dentant senza metter en dumonda la libra chatscha da patenta sco quai ch'ils iniziants fan. Cun declerar l'iniziativa per nunvalaivla vegner impedì ch'il suveran stoppia votar giu davart ina iniziativa ch'è cunter dretg.

Na dispitaivla è stada l'entrada en il concordat davart mesiras privatas da segirezza en connex ed era cun il concordat midà concernent mesiras cunter la violenza tar occurrenzas da sport. L'emprim concordat numnà pretenda da nov ina lubientscha per mesiras da segirezza ed unifitgescha l'applicaziun dal dretg. Uschia pon ins segirar che persunas bain-scoladas e qualifitgadas exequeschian pensums polizials. Tar il segund concordat sa tractia i da cumbatter la violenza tar occurrenzas sportivas cun dar a las autoritads la pussaivladad da prender las mesiras necessarias. Quai valia tar gieu da ballape e hockey sin glatsch da las ligas superiuras che sustastattan ad ina permissiun. Quai pertutgia en il Grischun il mument sulet ils gieu dal Club da hockey Tavau (HCD).